

Jes. 6,16

„So seggt uns Herrgott: Fragt nah den Weg vörtieden. Öwerleggt, wat de gode Weg is, den sallt ji wannern; so ward juch Seel to Roh kamen.“

De Küstenstrat von Wismer nah Lübeck löppt midden dörch uns Lüttstadt Klütz. Un midden in uns Lüttstadt Klütz liggt an dissen Strat de oll St. Marienkark von 1250. Vål Verkiehr löppt jüst in Summer. Äwerst nich allens löppt vörbie. Uns Karkendören stahn wiet apen. Von de Strat kannst middendörch uns Kark kieken.

Ick will di woll giern in dis Kark inladen, dormit du ein Ogenblick utraugen kannst up dien´ Weg. Köhl is dat hier binnen. De Larm dor buuten geiht uns nix mihr an. Ick sitt bie di. Uns Gedanken gahn trügg in dat Johr 1250. Dor sünd uns Vöröllern in Glowen hier inwannert un hebben Gott lawt mit dissen Karkenbuu. Ehr Glowen an unsen Herrgott möt stark un fast west sien, so stark un fast as de Karkenmuern un de Süülen, dei dat Dack dragen.

Sünndag för Sünndag hebben´s sick tohoop funn, üm Gott to lawen un to danken för allen Segen, üm Gott to bidden för Biestand un Kraft up ehren Weg.

De Dööpsteen is noch wat öller. Hei hett as Ballaststeen al ein Seefohrt achter sick. Haut is hei ut swedisch Granit. Woväl Kinner sünd dor woll indöfft wurden? Woväl Hoffen hett de Tospruck von Heilig Geist de Minschen för ehr Lewen gewen? Dormit hebben´s ehr Lewen modig anfangen.

Un wenn ick up den Fotbaden kiek, mark ick, dat ick up ein Grawsteen stah. „1585“ un „In Godt Entslapen“ is noch god to lesen. Woväl Trost hebben de Lüüd hier in de Kark funn´? So is ehr künnig wurden: In Lewen un in Dod wi bliewen as Christenminschen tohoop.

Ick häg miene Ogen wedder up un kiek up den Altor, ein wunnerbor Kunstwark ut de Barocktied. Ein Bild malt vont Heilig Abendmahl in de Prädella un de krüüzig Jesus bienah lewensgrot in de Midd. Wedder gahn mien´ Gedanken trügg un ick seih de välen Konfirmanden för mi, dei hier up de Knei gahn sünd un segent wurden. Wo is ehr Weg woll affloopen ? Woväl sünd in Krieg gahn un folln? Denken möt ick ok an Fruu un Mann, dei hier truugt wurden sünd. Ok sei hebben hier Gotts Segen toseggt krägen. Wat hebben´s mit Gotts Segen anfang´?

Un dunn seih ick väle Christenminschen hier üm den Altor stahn. Brot un Wien deilen´s . Etten un Drinken up den Weg, naug för de Seel. Un ick seih mi midden in den Krink stahn un freu mi bannig, dat ick dortohüüren do. So will ick woll ok mit mien´ Heiland mien´ Lewensweg wannern. Dor ward mi nich gruugen. Mien Lewen ward bie em to Roh kamen.

(Pastor i. R. Peter Wittenburg, Rostock)